

Sekondari ya bweni ya Mshangano inavyotekeleza kwa vitendo sera ya elimu ya Awamu ya Tano

SHULE ya sekondari ya Mshangano iliyopo katika Halmashauri ya Manispaa ya Songea mkoani Ruvuma ndiyo sekondari pekee ya bweni hapa nchini ambayo wanasoma watoto wa masikini na matajiri.



Mkurugenzi wa Taasisi ya HOJA PROJECT TANZANIA Oswin Mhundi ambao ndiyo wamiliki wa sekondari hiyo anasema shule hiyo ambayo hivi sasa ina kidato cha kwanza na pili, wanafunzi wake wanafanya vizuri kitaaluma.

Hata hivyo Mahundi anasema sekondari hiyo haikujengwa na HOJA PROJECT bali ilinunuliwa kutoka katika Taasisi nyingine ya kiislamu inayoitwa MTAMALIC na kwamba sekondari hiyo hapo awali ilikuwa inaitwa Muslim Seminary.

Amesema baada ya shule hiyo kununuliwa na HOJA PROJECT TANZANIA, imefanyiwa ukarabati na kuanzisha shule hiyo upya mwaka 2018 ikiwa na kubadilisha jina na kuiita Mshangano sekondari.

“Lengo la kuanzisha sekondari hii ni kuinua vipaji vyta kitaaluma kwa watoto wa Tanzania”, anasema Mahundi.

Anasema shule hiyo imelenga kuwa ya kitaifa na kimataifa na kwamba hadi sasa wanafunzi wanaosoma katika shule hiyo wanatoka katika mikoa ya

Ruvuma,Dar es salaam, Pwani, Dodoma,Ruvuma,Shinyanga,Mwanza na Simiyu.

Kulingana na Mkurugenzi huyo,wameamua kuchukua wanafunzi kutoka katika mikoa yote ili kuifanya shule hiyo kuwa na hadhi ya kitaifa na kwamba kila baada ya miezi mitatu shule hiyo itakuwa inapokea walimu wa kujitolea toka nje ya nchi ili kuifanya shule hiyo kuwa ya kimataifa.

“Tunachukua wanafunzi kutoka mikoa yote ya Tanzania na walimu toka nje ya nchi ili kuchanganya culture tofauti tofauti na kuleta maana halisi ya kujifunza,kujifunza sio darasani tu hata kuishi maisha ya kawaida pia ni kujifunza”,anasisitiza Mahundi.



Anasema sekondari hiyo changa ina jumla ya wanafunzi 60 wanaosoma kidato cha kwanza na wanafunzi wanaosoma kidato cha pili wapo 19 ambao wamechukuliwa katika mazingira magumu na wenye mazingira mazuri ambapo katika shule hiyo watoto wote bila kujali uwezo wa wazazi wao wanapata nafasi ya kupata elimu kwa gharama nafuu.

Kulingana na Mahundi shule hiyo ina walimu wazoefu na magwiji katika masomo ya Sanaa na Sayansi lengo ni kuhakikisha wanafunzi wanaomaliza katika shule hiyo wawe na soko kitaifa na kimataifa hasa katika kukabiliana na soko la ajira katika Dunia ya utandawazi.

“Tunafanya usaili kwa wanafunzi waliomaliza darasa la saba,mwanafunzi anayefanya vizuri lakini hana uwezo kiuchumi anachukuliwa bure halipi ada hata shilingi 100”,anasema Mahundi.

Anaongeza kuwa mwanafunzi aliyepata A+ katika usaili halipi ada kabisa,aliyepata A- analipa ada asilimia 60 ya gharama ya sekondari hiyo ambayo ni shilingi 300,000 kwa mwaka na kwamba anailipa kwa awamu nne hali ambayo inamwezesha kila mzazi kumudu gharama za mtoto wake kusoma akiishi bwenini.



Amesema mwanafunzi aliyepata B katika usaili huo analipa ada ya kukaa bwenini ambayo ni shilingi 500,000 kwa mwaka ambayo anailipa katika awamu nne.

Amesema wanafunzi wote katika shule hiyo wanaishi bwenini ili kuendana na ratiba za shule kwa manufaa bora ya kitaaluma.

“Wanafunzi wote wanaosoma katika shule hii wanaongea lugha ya kiingereza muda wote na taaluma yao ipo juu sana,wanafunzi wamekuja hapa hawawezi kuongea lugha ya kiingereza,hivi sasa asilimia 99 ya wanafunzi wanazungumza kiingereza sanifu kabisa”,anasisiza Mkurugenzi wa HOJA PROJECT TANZANIA.

Amesema matokeo ya Mei mwaka huu yanaonesha kuwa insha(essay) ambayo imeandikwa na mwanafunzi wa kidato cha kwanza katika shule hiyo inafanana na mwanafunzi wa kidato cha nne na kwamba hali hiyo inadhihirisha kuwa malengo yalioyowekwa na shule hiyo yanaweza kufikiwa.



Anayataja malengo makuu ya kuanzishwa kwa sekondari hiyo ni kuhakikisha kuwa inainua vipaji vyta taaluma kwa wanafunzi wa Tanzania.

“Tunataka kuona wanafunzi watakaokuwa wanamaliza kidato cha nne hapa ,wazazi wakifika wawe wanaouliza mwanangu amepata division one ya ngapi,asiulize amepata division gani”,anasisitiza Mahundi.

Anaitaja miundombinu iliyopo katika sekondari hiyo kuwa ni vyumba vyta madarasa vinavyotosheleza mahitaji,umeme wa TANESCO na wa jua,jengo la utawala,Maji,mabweni ya kutosheleza wanafunzi wa kike na wa kiume,vyoo bora,samani mbalimbali,maktaba,maabara,bwalo la chakula,ukumbi wa kuangalia habari,duka la shule,saloni na viwanja vyta michezo vyenye hadhi ya kimataifa.

Amesema licha ya wanafunzi wanaosoma kulipa ada ndogo ambayo haitoshelezi kuendeshea shule hiyo,shule inaweza kuijiendesha yenyewe kutokana na miradi mbalimbali ikiwemo ufugaji wa ng'ombe,kuku,mbuzi na kilimo cha mazao mbalimbali hali inayowezesha shule hiyo kukidhi mahitaji yake.

“Tuna mpango siku za usoni shule hii kuwa sawa na Paradiso,mtu akifika hapa asitamani kutoka,tumepanda matunda ya aina mbalimbali yakiwemo mapasheni zaidi ya 260 ambayo yapo kwa mtindo wa tyube ili kuifanya shule kuwa very unique hapo baadaye”,anasisitiza Mahundi.

Anayataja matunda mengine yaliyopo katika shule hiyo kuwa ni miti ya miembe zaidi ya 100, maparachichi, mapapai na ndizi vyote vikiwa vimepandwa ili kutoa mlo kamili kwa wanafunzi ili waweze kusoma vizuri na kwamba Julai mwaka huu shule yote itajengewa uzio kwa ajili ya usalama wa wanafunzi.

Kwa upande wake Makamu Mkuu wa shule hiyo Adams Ngogo anasema wanafunzi wanaosoma katika shule hiyo wana maendeleo makubwa kitaaluma kwa sababu kuna walimu wa kutosha katika masomo ya Sanaa na Sayansi.



Amesema lugha ya kiingereza ambayo inazungumzwa na wanafunzi muda wote wanapokuwa shulenii imewawezesha wanafunzi kupokea na kuelewa vema masomo wanayofundishwa kwa lugha ya kiingereza.

“Kila wiki tunafanya mtihani wa majaribio na wanafunzi hao wanafanya vizuri sana, ratiba ya wanafunzi tangu kuamka hadi kujisomea wakati wa usiku inawafanya wanafunzi kuwa busy muda wote hivyo kufanya vizuri kitaaluma”, anasisitiza Makamu Mkuu wa shule.

Kwa upande wake Mwanafunzi Selina Bernad anayesoma kidato cha kwanza katika shule hiyo anasema yeye binafsi anaipenda shule hiyo kutokana na walimu kufundisha vizuri pia mazingira bora ya kujifunzia na kufundishia ni kivutio kwa wanafunzi.

Naye Sophia Mbaga mwanafunzi wa kidato cha pili katika shule ya sekondari ya Mshangano anasema shulehiyo ina mazingira bora ya kusomea,chakula bora kinatolewa kwa wanafunzi,vifaa bora vyta kujifunzia vikiwemo vishikwambi(tablets),kompyuta,maktaba na maabara.

Makala imeandikwa na Albano Midelo,mawasiliano baruapepe
albano.midelo@gmail.com,simu 0784765917